

EDITORIAL

Ibunannag ti bulok a reaksyunaryo nga eleksyon a natatek ti sinasaur

Sinasaur ti tatak ti eleksyon iti sidong ti reaksyunaryo nga estado iti Pilipinas. Balbaliw a naipakita daytoy iti napalabas nga eleksyon nu sadinno a nasaknap, sistematisiko ken garapalan ti manipulasyon iti resulta ti panagbobotos tapno paboran ti agar-ari nga aso-aso a rehimen Marcos.

Iti sango ti agsusumbangir nga anomalyo ken kinapalpak ti sistema ti panagbilang ti botos ti Commission on Elections ken Miru Systems, saan a mamati ti dakkel a paset ti umili a ti resulta ti eleksyon ket sarming ti pudno a botos da. Manipud idi nangrugi ti dekompyuter a panagbilang iti Pilipinas, ti sinasaur ket dimmanon iti awan kapada a tukad, nasaknap a "dagdag-bawas" nga awan makakitki-ta ken makaammo, malaksid iti agar-ari a gunglo ken pribado a gangannaet a kumpanya a nangaramid ti sistema a saan a mailuklukat wenno maipasasukimat iti publiko.

Nasaknap met ti dadduma pay a langa ti panagsaur iti eleksyon kas ti ginnatangan ti botos, panagaramat ti pondo a pangpubliko (nangruna iti wagas ti panangibunong ti ayuda ti guberno), panagranggas ken panangkigtot ken *Red-tagging*.

Napagtalinaed ti rehimen Marcos ti mayoria a kontrol iti Senado ken Kongreso. Babaen ti kontrol iti Kongreso, sigurado nga

ad-adda pay nga iduron ni Marcos ti badyet, dagiti linteg ken programa nga umannurot iti diktat dagiti gangannaet a bangko ken kumpanya, a padagsen ken parigat iti umili. Sigurado a maaramat daytoy a dominasyon iti Kongreso tapno aywanan ti interes ti gunglo ni Marcos.

Todo-todo ti inaramid a pannakibiang ti imperyalismo a US iti eleksyon iti Pilipinas. Palalo nga agdan-

danag daytoy iti umun-uneg a krisis iti pulitika ti agar-ari a sistema, iti sango ti kumarkaro a susik dagiti gunglo a Marcos ken Duterte. Iti partikular, iti sango ti kumarkaro a krisis iti pagbiagan ken kumarkaro a pungtot ti umili, madandanagan daytoy iti pannakaisina ti aso-aso na a ni Marcos, ken panagpigsa ti gunglo a Duterte, nga ar-aramaten ti karibal na a China tapno agpau-neg iti impluwensya iti Pilipinas.

Inusar ti US ti bileg, impluwensya ken silpo dagiti ahente daytoy iti pulitika, negosyo, midya, simbaan ken dadduma pay a sektor tapno patauden ti maysa a "maikatlo a pwera" a bukuklen dagiti partido ken pulitiko a mannakigayyem iti US nga agdama a nakalinya iti koalision ti Liberal-Akbayan-Pink (LAP). Binukel da dagiti innareglo iti pulitika tapno siguraduen nga umuna dagiti kandidato daytoy iti Senado ken sistema a *party-list*, tapno ilaban iti gunglo a Duterte iti eleksyon 2028.

Induron ti US ni Marcos nga awiten dagiti kandidato ti LAP iti kinasenador a da Bam Aquino ken Francis Pangilinan. Inaklon mismo ti tagapagsarita ti partido ni Marcos a sipipinget nga induron da ti kandidatura ti dua. Kagiddan daytoy, nakipag-areglo ti mabigbig a personahe ti LAP a ni Leni Robredo



iti Iglesia ni Cristo tapno awiten ni Aquino, kasukat ti panangiyendorso na ken Rodante Marcoleta, mabigbig nga aso a pang-atake ni Duterte, nangruna kontra iti ABS-CBN idi 2020. Palalo a "nasorpresa" ti amin a naala ti dua ti maikadwa ken maikalima a pwesto (manipud iti ranggo a 13 agpababa kadagiti sarbey). Nagsallapid ti dila ti gunglo a Marcos ken LAP ken dagiti tagasuporta daytoy iti akademya, masmidya ken simbaan iti panangipalawag iti daytoy a "sorpresa," iti gandat a bukbohan ti nalamiis a danum ti tignay kontra iti sinasaur ken narugit a pulitika.

Kas iti napalabas nga eleksyon, induron ti imperyalismo a US ti todolarga a kampanya ti rehimen Marcos laban kadagiti patriyotiko ken progresibo a grupo a kumandidato iti senado ken *party-list*. Inaramat daytoy ti NTF-Elcac, militar ken pulis ken sibubukel a rekursu ti estado iti nasaknap a *Red-tagging*, pammutbuteng, panangipila ti pinarbo a kaso, panagaresto ken pampapatay. Tapno ikalintegang ti pangpulitika a panagikuspil, inusar ni Marcos ti pasista a rason a dagitoy a grupo ket mangbukbukel ti "insurhensya a naglemmeng iti eleksyon," iti gandat a serraan ti amin a tay-ak para iti

demokratiko a panagiyeckas.

Kas kadagiti napalabas a tawen, isuda ket pinuntirya ti sistematiko a panagkissay ti botos dagiti progresibo a *party-list* babaen ti dekompyuter a sistema ti panagbilang. Supsuportaran ti US ken aso-aso a rehimen Marcos dagiti maka-US a grupo a repormista kas ti Akbayan a manangallilaw nga iladladawan da a "Kannigid" tapno iyaw-awan ti umili manipud iti dana ti pudno a patriyotiko ken demokratiko a panagbalbaliw. Gagem daytoy nga apputen ti ngiwat ti amin nga agsarsarita laban iti kumarkaro nga interbensyon militar ti US iti Pilipinas ken panangusar ti pagilyan kas dakkel a base militar tapno agistasyon ti rinibo a tropa nga Amerikano ken agiyimbak kadagiti armas kagiddan ti panagsagana daytoy ti gera laban iti China.

Iti laksid daytoy, naaramid dagitoy a grupo a makaisayangkat ti nasaknap a kampanya iti intero a pagilyan. Nalawag nga inawit da ti programa tapno iyabante ti nailyan ken demokratiko a tarigagay ti umili ken dagiti panawagan para iti maka biag a sweldo, trabaho, nababa a presyo ti taraon ken langis ken dadduma pay a madagdagus a panawagan ken kasapulan dagiti mang-

mangged, mannalon ken dadduma pay a nakurapay ken maidadan a sektor ti kagimongan a Pilipino. Iti pannakipaset da iti eleksyon, naaramid da a kariten, ibunannag ken babalawen ti panagturay dagiti bukrurata kapitalista, burges komprador ken apo't daga.

Balbaliw nga inpakita ti napalabas nga eleksyon iti pagilyan nga awan ti pudno a demokrasya iti Pilipinas. Maar-arkusan laeng ti reaksiyunaryo a gubyrno ti arwat ti demokratiko a balubal iti pulitika, a ti laeng pudno a makaay-ayam ket dagiti partido ken kandidato nga adaan aglaplapanan a kwarta a panggatang iti turay.

Isursuro ti pakasaritaan a kasapulan ti rebolusyonaryo a dangadang tapno magun-od ti pudno a panagbalbaliw a tartarigagayan ti umili a Pilipino. Panggep ti rebolusyon nga agawen ti bileg iti pulitika manipud kadagiti agar-ari a dasig tapno maitakder ti maysa a pudno a demokratiko a gubyrno a mangibagi iti interes ti umili. Kasapulan a tenglen dagiti maidadan a dasig ti estado poder tapno ipatungpal dagiti panagbalbaliw iti ekonomya ken sistema ti kagimongan pabor iti umili.

Maaramid laeng daytoy a panagbalbaliw babaen ti rebolusyonaryo nga armado a dangadang, kas kangrunaan a langa ti dangadang, kagiddan ti dadduma pay a langa ti panaglabaan. Babaen ti panangiya-bante ti New People's Army (NPA) iti naunday a gubat ti umili tapno paset-paset a rebeken ti pigsa ti kabusor, tukad-tukad nga itaktakder ti NPA ken masa ti baro a demokratiko a gubyrno ken baro a sistema ti kagimongan, nu sadinno a ti masa ti agnumar iti kinabaknang a parpartuaten da.

Aggingpinget ti umili a Pilipino ken dagiti rebolusyonaryo a pwersa da iti dana ti armado a dangadang a determinado nga umabante ken gun-oden ti balligi iti masakbayan. Awan ti makalapped iti panagtungpal da iti istorikal a rebengen a gun-oden ti nailyan a wayawaya ken pudno a demokrasya.



Tawen LVI No. 10 | Mayo 21, 2025

Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tay.

Linaon

Editorial: Ibunannag ti bulok a reaksiyunaryo nga eleksyon a natatek ti sinasaur 1

Awan ti baro iti eleksyon 2025 3

Tuloy ti laban ti Makabayan 4

Dagiti protesta 4

Manipulasyon iti presyo ti langis 5

"Plano iti kapya" ni Marcos, ubbaw 6

Iti ababa a sarita 7

Panangrabsut ti daga idiay Lanao del Sur 8

Manangallilaw a kapya 9

2 Nalabbaga a mannakigubat, nadukot ken napapatay 9

Panangibasura ti kontrata iti PrimeWater 10

Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan

 ang.bayan@cpp.ph

Awan ti baro iti eleksyon 2025

Kas kadagiti napalabas nga eleksyon, pinagaryan ti "guns, goons, gold" ti eleksyon a *midterm* tatta 2025. Agdadata ti nagbalin a sinasaur ken manipulasyon babaen ti *automated* a panagbobotos ken kinaranggas laban iti kadawyan nga umili. Awan ti baro iti eleksyon, ken balbaliw nga inikkan daytoy ti demokratiko nga abbong ti panangipatugaw kadagiti mangibagi kadagiti apo't daga, dadakkel a burges kumprador ken ti imperya-lista a US.

Natatek ti sinasaur


Mano nga aldaw sakbay ti panagbobotos, naibunannag a sinukatan ti Miru ken Comelec ti sistema a mangkonkontrol kadagiti "automated counting machine" a saan a dimmalan iti independyente a panagsukimat ken panagrepaso.

Iti mismo nga aldaw, nadumaduma nga anomalya ti naiyulat dagiti grupo nga agpalpaliw iti eleksyon. Iti ulat ti grupo a Kontra Daya, nasurok 50% dagiti reklamo a naawat da ket seknan kadagiti pirmalya a makina, kasaruno ti iligal a panagkampanya, ginnatangan ti botos ken dagiti mapukpukaw a nagan kadagiti listaan ti botante. Adda met dagiti ulat ti *Red-tagging* ken panagipasaknap ti peke a damdamag.

Apaglukat pay laeng dagiti presinto, adun dagiti simmangpet a reklamo panggep iti "inconsistency" wenno saan a panagtutunos dagiti makina ti Miru Systems Co. Ltd, kumpanya a South Korean, a binayadan ti gubyrno ti ₱18 bilyon.

Kabilang ditoy ti adu nga ulat ti saan a naallawat a botos gapu iti "overvoting" (sobra a botos kadagiti pusisyon). Adda met dagiti ulat ti "undervoting" (kurang a botos) uray pay kumpleto ti minarkaan dagiti botante. Dinillaw dagiti grupo ti "marker" (pentel pen) a naaramat nga addaan palalo a napuskol a tinta ken nangato a "sensitivity" (kinasensetibo) ti makina.

Segun iti Parish Pastoral Council for Responsible Voting (PPCRV), tatta laeng nga eleksyon a nakaawat da ti kasdiay kaadu ken klase dagiti reklamo. Kuna daytoy, saan a maa-



muan nu agtunos dagiti botos iti balota iti irerehistro ti makina, malaksid laengen nu manwal a bilangen dagitoy.

Adda ti 18.2 milyon a naimaldit nga "overvote" nu sadinno a 16.8 kadagiti senador bayat nga adda ti dandani 3.3 milyon iti party-list. Nasyon ditoy, adu a presinto ti naladaw idi nangrugin ti panagbobotos gapu ta saan a kankanen (ti makina) ti balota.

Inyulat met ti PPCRV dagiti anomalya iti panangibato ti Comelec kadagiti resulta ti panagbibilang. Alas-8 ti rabii iti aldaw ti panagbobotos, inreklamo ti grupo a saan a kagiddan a naawat daytoy dagiti elektoral a transmision. Ti naawat da a 15% ket aglalaon laeng ti "headers" ken saan a dagiti aktwal a botos. Ad-adda a nagbalin a pagduduaan ti panagbilang idi kellaat nga ikissay ti Comelec ti 5 milyon a botos manipud iti 15,000 presinto gapu ta "nadoble" kano dagitoy.

Natatek met ti anomalya ti "online voting" dagiti *overseas* Filipino workers nu sadinno a narigatan da nga agbotos gapu ditoy.

Nakaad-adu met ti naiyulat a kinaranggas nga addaan kainaigan iti

eleksyon iti panawen ti kampanya. Manipud Enero agingga Abril, adda ti naiyulat a 26 nga insidente. Iti bisperas ken mismo a kaaldawan ti panagbobotos, nasaknap dagiti ulat ti pinnaltog ken armado nga atake a nagresulta iti 16 a natay.

Kabayatanna, saan a naipatungpal ti European Union Election Observation Mission ti rebbengen daytoy nga agpalpaliw iti eleksyon iti pagilyan kalpasan a paritan isuda ti Comelec a makastrek kadagiti presinto iti aldaw ti panagbobotos. Nadlaw da met ti nasaknap a ginnatangan ti botos iti pagilyan.

Naimaldit met ti International Observer Mission ti agtutunon nga anomalya iti panagpalpaliw da. Simmango met daytoy iti agdadata a panagikuspil ti estado idi maparitan ti maysa a delegado da a makastrek iti Pilipinas ken maideport iti US.

Panagari ti sumagmamano

Nalpas ti eleksyon 2025 ngem awan ti baro ken isu met la nga isu dagiti nagan dagiti nangabak ken nakaala ti poder.

Lima a Marcos ti nangabak iti napalabas nga eleksyon. Agtugaw kas senador ni Imee Marcos, ni Cecilia Araneta-Marcos kas gobernador ken Matthew Joseph Manotoc kas bise gobernador, ni Ferdinand Alexander Marcos (Sandro) ken Angelo Marcos Barba kas kongresista ti

Suruten iti panid 4

umuna ken maikadwa a distrito ti Ilocos Norte.

Saan met a bumaba iti lima a Romualdez, kabagyan met dagiti Marcos, ti nakaala ti pwesto idia Leyte. Nangabak kas kongresista ni Martin Romualdez iti umuna a distrito ti Leyte. Nabukodan da ti pusisyon ti mayor, bise mayor ken maysa a konsehal iti Tacloban City. Maysa met a Romualdez ti agtugaw kas maysa iti tallo a mangibagi ti Tingog Party-list, partido a binukel ti pamilya.

Iti beneg dagiti Duterte, innem ti nangabak iti eleksyon. Mainayon da iti nakatugaw a Bise Presidente Sara Duterte ken maysa a kapitan ti barangay idia Davao City. Nabukodan dagiti Duterte ti intero a Davao City (mayor, bise mayor, kongresista ti umuna ken maikadwa a distrito ken maysa a konsehal). Nabotosan a mayor ni Rodrigo Duterte uray nakabalud iti International Criminal Court idia The Hague gapu iti kaso a krimen iti sangkatawan. Nangabak met ti maysa a Duterte nga umuna a nominado ti PPP Party-list.

Kabayatanna, nakaala ti tallo a pwesto ti Duterte Youth Party-list a numan pay saan a dagiti Duterte ti nominado ket agserserbi a silpo ti bileg da.

Iti Senado, dua a Tulfo tatta ti nakatugaw kalpasan a mangabak ni Erwin. Adda met ti sagdudwa a senador dagiti Cayetano ken Villar. Siguden a nakatugaw ditoy ti agkabsat nga Ejercito-Estrada iti sidong ti kapada a pamilya.

Agtaltalinaed met ti kapet dagiti Bulut iti Apayao, dagiti Ortega iti La Union, pamilya a Dy iti Isabela, Ebdane iti Zamboales, Kho iti Masbate, dagiti Tan ti Samar, Alonto-Adiong ti Lanao del Sur, Hataman-Salliman ti Basilan, pamilya a Sali iti Tawi-Tawi ken adu pay. **AB**

Tuloy ti laban ti Makabayan

KALPASAN TI PANAGBOBOTOS, inpekta ti Koalisyon Makabayan ti panagyaman iti amin a tagasuporta, kampanyador ken nagbotos iti 11 a kandidato daytoy iti kinasenador ken uppat a party-list. Sinigurado ti koalisyon nga agtultuloy da iti dagadang para kadagiti demokratiko a karbengan ti umili a Pilipino uray nalpasen ti kampanya ken panagbobotos.

Nakaawat ti kagudwa a milyon agingga 4.64 milyon a botos dagiti kandidato iti kinasenador ti Makabayan. Ti uppat a party-list ti Makabayan nga ACT Teachers, Kabataan, Gabriela Women's Party (GWP) ken Bayan Muna ket nakaala ti kabuklan nga 1.08 milyon a botos. Saggaysa a pwesto ti naala ti Kabataan ken ACT Teachers bayat a napaay ti GWP ken Bayan Muna a mangabak.

Segun iti koalisyon, ti botos ken suporta a naawat da ket saan laeng a numero nga agtalinaed iti balota, nu di ket pammaneknek ti takder laban iti bulok a sistema a nabayagen a mangririribuk iti pagilyan. Segun kadakuada, daytoy ket simbolo ti bilang ti mangmanged a Pilipino a lumablaba para iti nayon a sweldo ken disente a trabaho, dagiti mannanon a tumaktakder para iti karbengan da iti daga, dagiti agtutubo nga agtatarigagay ti nainkalinteg ken nawaya a masakbayan, ken dadduma pay a makidagadang a demokratiko a sektor.

Naaramid ti Makabayan nga isayangkat ti maysa a nailyan a kampanya ken makakalap ti minilyon a botos iti laksiid ti agdadata a panagsaur iti eleksyon 2025, babaen kadagiti automated a makina, sostenido ken koordinado nga atake dagiti pwersa ti estado, awan-sarday a Red-tagging ken panagikuspil ken kampanya ti disimpormasyon.

Timmakder ti koalisyon laban kadagitoy. Nakikaykaysa da kadagiti demonstrasyon ken piket ti Kontra Daya ken Bagong Alyansang Makabayan iti nadumaduma a paset ti pagilyan.

Idi Mayo 13, nagmartsa dagiti raliyista agturong ti Manila Hotel idia Manila nu sadinno nga agisaysayangkat ti nailyan a panagbibilang ti Comelec. Didiay met laeng nga aldaw, nagisayangkat ti protesta dagiti grupo ken partido idia Iloilo City ken Cavite City. Idi Mayo 14, balbaliw a nagprotesta ti GWP iti Manila Hotel ken naangay met ti demonstrasyon idia Quezon City, Trece Martires City idia Cavite, Batangas, Laguna, Aklan ken Cebu. Napasamak dagiti kapada a protesta kadagiti sumaruno nga aldaw.

Maysa met a dakkel a rali ti insayangkat dagiti grupo idi Mayo 19 iti Manila Hotel kagiddan ti proklamasyon dagiti nangabak iti eleksyon a party-list.



60-aldaw Lakbayan manipud Zamboanga. Nagisayangkat ti 60-aldaw a martsa dagiti mannanon, mangngalap ken katutubo nga umili manipud iti nadumaduma a prubinsya tapno supyaten ti panagkamkam ti daga ken kadanuman, a pagnaedan ken pagtataudan ti pagbiagan da. Nangrugi daytoy idi Marso 13 idia Zamboanga Sibugay ken nagleppas idia Metro Manila idi Mayo 10.

Pammadayaw kadagiti mangmanged iti salun-at. Nagisayangkat ti noise barrage ken piket dagiti unyon iti sidong ti Alliance of Health Workers idi Mayo 7 kas pananglagip iti Aldaw dagiti Mangmanged iti Salun-at. Dagiti tignay ket kangrunaan a naisayangkat idia Metro Manila, bayat nga adda met dagiti taripnong idia Baguio City iti panangiyuna ti Coalition of Health Workers' Organizations in the Cordillera.

Labanan ti dredging. Sinupyat dagiti residente ti Barangay Silonay, Calapan City, Oriental Mindoro ti plano a dredging iti igid-baybay ditoy ken kaabay a Barangay Maidlang. Inyebkas da ti panagsupyat iti naiyaramid a pangpubliko a konsultasyon idi Mayo 9, iti suporta ti Mindoro Forum Network (MFN), Alyansa Laban sa Mina ken dagiti upisyal ti barangay. Simmangpet idi Abril 29 ti dadakkel a trak iti sungadan ti Silonay-Bucayao River para iti sand testing a nagdanagan dagiti residente.

Manipulasyon, ispekulasyon ken monopolyo a panangikeddeng iti presyo ti langis

Kada Martes, agbalbaliw ti presyo dagiti produkto a petrolyo iti Pilipinas. Manipud Enero agingga Mayo 20, ngimmato daytoy ti 11 a daras bayat a 10 daras met a bimmaba daytoy. Dakdakkal dagiti panangngato kumpara kadagiti panagbaba a nagresulta iti neto a nayon a ₱4/litro iti presyo ti gasolina ken ₱3.80/litro iti presyo ti diesel.

Idi Mayo 20, balbaliw a nagprotesta dagiti demokratiko a grupo, iti panangiyuna ti Bayan Muna, laban iti maysa manen a dakkel a panangngato ti presyo (₱1.30/litro iti gasolina; ₱1.80 iti diesel ken ₱0.95-₱1.40 iti kerosina). Daytoy ket iti laksid ti tuluy-tuloy a panagbaba ti presyo ti krudo a langis iti agingga \$10 kada bariles iti pagtagilakuan manipud pay Abril.

Kanayon nga irasrason dagiti kumpanya ti langis ken ti Department of Energy (DoE) a ti panangngato ti presyo ket "sarming ti panagbaliw-baliw ti presyo ti krudo a langis iti sangalubongan a partagilakuan." Kabilang kadagiti mairasrason ti panagkissay ti produksyon ti Organization of the Petroleum Exporting Countries (OPEC), panangngato ti demand kadagiti nalammiis a pagilyan, uray metten ti panagbettak dagiti armado a binnusor nga addaan kainaigan kadagiti prodyuser ti langis.

Manipulasyon ken monopolyo a panagpresyo

Saan a prodyuser ti langis ti Pilipinas. Agmaymaysa laengen ti planta daytoy nga agreprepina ti krudo a langis. Idi 2024, mapatta-patta nga adda iti abereyds a 471,000 bariles ti nadumaduma a klase ti produkto a petrolyo tunggal aldaw ti makonkonsumo iti pagilyan, nu sadinno a 95-99% daytoy ket imported. Idi 2022, 78.2% ti imported a langis ket repinado, bayat a 21.8% laeng ti maang-angkat a krudo a langis.

Iti kasta, pudno nga apektado ti lokal a presyo ti langis iti agbaliw-baliw a

presyo ti krudo a langis iti sangalubongan, ngem saan a direkta daytoy. Ad-adda a direkta ti epekto iti lokal a presyo dagiti panagbalbaliw iti gastos iti panagrepina, dagiti problema iti suplay wenno proseso ti panagrepina, dagiti lokal a naipataw a buwis (12% VAT ken excise), gastos iti transportasyon ken sinnukatan ti piso ken dolyar.

Iti kabuklan, apektado dagiti garaw-kartel ti OPEC+ ti presyo gapu ta kontrolado daytoy ti 40% ti suplay ken 80% dagiti reserba a langis iti intero a lubong. Adda kabaelan ti kartel nga ikeddeng a nalablabes iti gastos daytoy iti produksyon ti linnakuan ti krudo a langis iti merkado. Ti Aramco ti Saudi Arabia, kaspangarigan, ket makaprodprod-yus ti krudo a langis iti gatad a \$11.80/bariles idi 2024. Daytoy a tawen, adda iti \$31/bariles ti linnakuan iti sangalubongan a merkado.

Manmanipulaen ti OPEC+ ti presyo ti krudo a langis iti sangalubongan a pagtagilakuan babaen ti koordinado a panagkissay wenno panagnayon ti suplay. Iti maysa a panagadal, madakdakamat nga agingga 30% ti sangalubongan a

presyo ti langis ket gubuay ti manipulasyon ti OPEC+ iti suplay.

Maudi a nagituding ti panagkissay ti produksyon ti OPEC+ idi Nobyembre 2023. Adda iti 2.2 milyon a bariles tunggal aldaw ti napagtutulan dagiti pagilyan nga ikissay iti produksyon tapno lapdan ti panagsuwek idi ti presyo ti krudo a langis. Ngem manipud Abril tatta a tawen, nagtutulag met ti walo a kadakkelan a prodyuser nga in-inot nga ingato ti suplay iti sumaruno a tallo a bulan. Kunkunada a bales nga addang daytoy iti panaglabsing ti Iran iti naituding a kota iti produksyon, ken iti kapada a panawen, pangkontra iti pangta ti US a layusen ti merkado ti relatibo a nalaklaka a shale oil. Saan a paset ti OPEC+ ti US ken anyaman a garaw daytoy iti produksyon ti langis ket agpangpangta nga umagaw ti paset ti OPEC+ iti merkado.

Iti inaldaw-aldaw a pannagna, ti makagapu iti panagbaliw-baliw ti presyo ti langis ket ti ispekulasyon iti maaw-awagan a "futures trading," maysa a sistema ti linnakuan nu sadinno a magatgatang ken mailaklako ti langis a maiprodyus pay laeng ken maaramat iti masangwanan. Maibagbaga a maikedkeddeng ti presyo ti "futures" segun iti ispekulasyon iti garaw iti merkado, dagiti posible a tubeng iti produksyon ken dagiti heyopolitikal a paspasamak, kas ti kellaat a panagbettak dagiti gubat wenno panagrukwas. Ngem segun iti maysa a panagadal itay nabit, 60%-65% ti panaggaraw ti presyo ti langis iti uneg ti maysa nga aldaw ti linnakuan ket gubuayen ti "algorithmic trading" wenno panagatatang ken panaglakko ti "futures" umannurot iti garaw ti teknikal a datos. Awanen ti kainaigan daytoy iti aktwal a garaw

Suruten iti panid 6



"Plano iti kapya" ti rehimen Marcos, ubbaw ken naulit-ulit laeng

Agsusumbangir a pananglalis ti simmabat iti "baro" a plano iti kapya ti rehimen Marcos nga inwaragawag iti publiko ti National Security Council idi maudi a lawas ti Abril. Pormal a benindisyunan ti rehimen ti National Plan for Unity, Peace and Development (NAP-UPD) idi inruar daytoy ti Memorandum Circular No. 83 idi Mayo 2.

Kagiddan ti panagipasaknap ti NAP-UPD, ipaspasindayag ti rehimen ken ti NTF-Elcac a naan-anayen a maatiw ti armado a tignay nu maparmeken iti panaggibus ti tawen ti "maudi a nakatakder a laranangan" a kunkuna daytoy nga adda idiay Camarines Sur. Segun iti Communist Party of the Philippines (CPP), loklokuen laeng ni Marcos ken dagiti upisyal na ti bagbagi da iti panangibaga a marebbeken ti rebolusyonaryo a tignay. Mapanpaneknekan ti kinaulbod daytoy iti agtultuloy a panagipakat ti militar ti pinullo a batalyon a pangkombat laban kadagiti yunit ti New People's Army iti intero a pagilyan.

Pananglalis ti CPP, kasano a maaddaan ti kapya iti tengnga ti tiranya ken panangdangran iti umili? Agtultuloy ti panagari-ari dagiti soldado iti ginasut a komunidad ti mannalon ken katutubo iti linged ti "community support." Kadagitoy a komunidad, a maipasasaw nga "insurgency-free," pawpawilan da

ti karbengan ti umili ken nasaknap dagiti panagabus.

Awan ti kapya agingga a nakabalud dagiti konsultant iti negosasyon a sumango iti panangresolba kadagiti ramut ti armado a risiris, segun iti CPP. Gagem laeng ti rehimen a pasukuen dagiti Nalabbaga a mannakigubat, traydoren ti rebolusyonaryo a panaglaban da ken ibati nga awanan depensa ti umili a Pilipino laban iti brutal ken naranggas a makinarya ti estado.

Agingga nga awan ti panangbigbig kadagiti ramut ti armado a risiris, awan ti mapasamak a kapya, segun iti CPP.

Linaleis met dagiti progresibo nga organisasyon ti NAP-UPD, nga inawagan da a "recycled."

Segun iti Bagong Alyansang Makabayan ken National Union of People's Lawyers, pinagtalinaed ti NAP-UPD ti siguden a managikuspil a pamuspusan tapno "magun-od ti kapya." Nalawag daytoy iti panangituding iti NTF-Elcac kas nang-

nangruna a para-ipatungpal ti programa, umannurot iti "whole-of-nation" approach. Kunada, inikkan laeng ti NAP-UPD ti baro a rupa ti siguden a nasubok ken napaay nga estratehiya iti kontra-insurensya.

Ammo dagiti grupo a ti pudno a punpuntiryaen ti NAP-UPD ket dagiti naparang nga organisasyon ti masa dagiti mangmanged, mannalon ken dadduma pay a maidadanes nga umili tapno pagulimeken isuda iti panaglaban da iti reaksyunaryo a gubyrno. Nalawag ditoy ti plano nga ad-adda pay a pairtengen ti pangpulitika a panagikuspil kadagiti demokratiko a sektor, manipud iti panangipaidam kadakuada ti demokratiko nga espasyo kadagiti pagadalan, lugar-pagtegedan ken uray iti parlamento. Nalawag met ti turongen daytoy dagiti managikuspil a linteg kas ti Anti-Terrorism Law ken Anti-Terrorist Financing Law tapno kano "iserra" ti "gripo" ti pinansya ken suporta iti armado a rebolusyon. Ti kastoy a malisyoso a panangisilpo kadagiti sibilyan ket agserserbi a pakauna tapno lipiten, ilegal nga arestaren ken itantan, pwersado a pukawen ken uray pay papatayen isuda. AB

Manipud iti panid 5

iti merkado ken dagiti paspasamak iti lubong.

Deregulado a manipulasyon

Iti Pilipinas, ad-adda pay nga ingatngato dagiti kumpanya ti langis ti lokal a presyo gapu iti Oil Deregulation Law, ti linteg a nangikkat iti kontrol ti estado iti industriya. Iti sidong daytoy a linteg, pinalubosan ti estado dagiti kumpanya nga "isurot" ti presyo da iti garaw ti sangalubongan a merkado ken direkta nga ipasa ti anyaman a panagbaliw-baliw kadagiti konsyumer. Naipasa ti linteg iti panggep nga allukoyen ti "nawaya a kumpetisyon" iti sektor.

Imbes a "kumpetisyon," nang-

parnuay ti linteg ti mala-kartel nu sadinno a naaramid a nalaka para kadagiti kumpanya ti langis a manipulaen, agsobra a presyo (*overprice*) ken agkukumplot. Awan ti obligasyon dagiti kumpanya nga ipakaamo iti estado ken publiko nu mano iti panagbaliw-baliw iti presyo ti paset ti panagbaliw-baliw iti presyo iti sangalubongan a merkado; mano ti paset ti panagrepina, panagimbak ken transportasyon ken mano ti naganansya manipud ditoy. Idi 2019, naiduron ti estado nga obligaren dagiti kumpanya nga isapubliko dagiti numero, ngem aktibo daytoy a linabanan ken inpasardeng dagiti kumpanya.

Napaneknekan iti napalabas a dakdakkal ti inngato dagiti lokal a presyo kumpara iti panagngato ti presyo ti krudo a langis iti sangalubongan a pagtagilakuan. Iti maysa a panagadal ti Ibon Foundation a simmaklaw kadagiti panagbaliw iti presyo manipud 1999 agingga 2011, nangatngato iti 20-22% ti lokal a presyo ti langis kumpara iti inngato ti presyo ti langis iti sangalubongan a merkado. Dua iti kadadakkelan a kumpanya ti langis iti pagilyan, ti Shell ken Caltex, ket subsidyaryo dagiti multinasyunal a kumpanya, nga agar-aramid ti manipulasyon ken ispekulasyon iti sangalubongan a saklaw. AB


15.4 milyon

botos a 26.85% iti amin a
botos para iti sistema a
party-list iti eleksyon 2025
ket naideklara a saan a
balido wenno blangko,
nangatngato bassit
kumpara iti eleksyon 2022
nga adda iti 15 milyon.



8 tawenen

manipud idi indeklara
ni Rodrigo Duterte ti
linteg militar idiay
Mindanao ken
pinulbos ti bomba ti
Marawi City idi Mayo
23, 2017. Nagpaut
daytoy agingga
Disyembre 31, 2019.



Agingga ita, adda iti 4.2% pay laeng kadagiti biktima
wenno **713 iti 17,000 a pamilya ti nakaawat ti**
kumpensasyon manipud iti estado.

Nagtaudan: Marawi Compensation
Board, Marso 2025

kaunaan a **balud**
pulitikal a nangabak
kas konsehal iti
eleksyon para iti UP-
Diliman University
Student Council.
Nakaala isuna ti
4,830 a botos ken
nabotosan kas
numero uno a
konsehal. **Dandani**
5 tawenen a
nakabalud isuna
idiay Tuguegarao City
iti pinarbo a kaso.



#1 USC councilor UPD

Amanda Lacaba Echanis

144 pinatay ti Zionista nga Israel

iti umuna nga aldaw ti dakkel a ground
invasion nga **Operation "Gideon's**
Chariot" a narugyan idi Mayo 17.

Panggep ti Israel nga ilayon a
sakupen ti intero a Gaza.



Buhay gerilya EPISODE 2

interbyu ken
Madaay Gasic,
tagapagsarita ti
NPA-Mindoro,
mabuyan iti
PRWC, FB/
BuhayGerilya
ken Youtube.



Africa Day

marambakan inton Mayo 25 kas pananglagip iti
pannakabuangay ti **Organization of African Unity**, nga idi
agangay ket nagbalin nga **African Union**. Nabuangay ti
OUA tapno iyabante ti panagkaykaysa ken panagtitinnulong
dagiti anti-kolonyal a tignay para iti wayawaya ken dagiti
baro a timmaud nga independyente a gubyrno iti 30
pagilyan nga African idi dekada 1960.

BULAN TI
SALUN-AT
ITI PANUNOT

12.5 milyon a Pilipino

wenno 11-16% ti populasyon ti agsagsagaba
ti problema iti salun-at ti panunot, kasansanan
ket ti *depression* ken *anxiety*.

1,530 rehistrado a *mental* *health professional*

iti Pilipinas idi 2023, wenno
3 iti tunggal 100,000 Pilipino.

Panagrabsut ti daga para kadagiti gangannaet a plantasyon, nasaknap idia y Lanao del Sur

Iti munisipalidad ti Amai Manabilang (dati a Bumbaran) idia y Lanao del Sur, madama a mapaspasamak ti nasaknap ken naranggas a panagrabsut ti daga dagiti Moro, Lumad ken setler a mannalon. Nagkumkumplot ti agsaruno a rehimen Duterte ken Marcos, ti lokal a dinastiya a Manabilang ken ti Armed Forces of the Philippines tapno pagtalawen dagiti agindeg iti lugar ken ipaaramat ti daga da kadagiti gangannaet a multinasyunal a kumpanya.

Instrumento ti reaksyunaryo nga estado iti panang-agaw ti daga ti Southern Philippines Development Authority (SPDA), maysa a *government-owned and controlled corporation* (GOCC) a nakaipasidong iti upisina ti presidente. Ti SPDA a nabuangay idi pay 1975, ket naipaayan ti karbengan iti "eminent domain." Kayat na a sawen, addaan daytoy ti ligal a bileg nga ag-agaw kadagiti pribado a daga para iti "pangpubliko nga usar." Addaan awtoridad daytoy nga isagut dagiti naagaw a daga iti siasinoman a pab-paboran daytoy a lokal wenno gangannaet a korporasyon.

Panagdur-as para iti gangannaet

Kas pakauna, pwersado a tinagikua ti SPDA ti 26,000 ektarya idia y Lanao del Sur ken inpasidong daytoy iti Agro-Industrial Development Program (AIDP), maysa nga "special agro-economic zone" a mangpadur-as kano iti atrasado nga ekonomya ti pribinsya. Sinaklaw ti AIDP ti erya a sigud a nakaipasidong iti Kapatiran Agro-Industrial Development Cooperative, maysa a "kooperatiba" nga inaramat idi ti diktadura a Marcos tapno pasukuen dagiti mannakigubat ti Moro National Liberation Front. Ti 16,000 ektarya daytoy ket adda idia y Wao ken ti 10,000 ket adda idia y Amai Manabilang. Gapu ta "special economic zone," agsagrap ti adu nga insentiba dagiti ga-

ngannaet a kumpanya ditoy kas ti saan a panagbayad ti buwis iti pastrek da, VAT ken taripa kadagiti ang-angkaten dagitoy a materyal. Adda met diskwento da iti abang, kuryente ken danum.

Manipud idi 2020, saan a bumba iti lima a dadakkel a kumpanya ti inserrek ti SPDA iti "espesyal a sona nga agrikultural."

Kadakkelan ditoy ti EcoPlanet Bamboo, maysa nga Amerikano a kumpanya nga inikkan ti SPDA ti inisial nga 8,360 ektarya iti 10 a barangay a nagbeddeng ti Amai Manabilang ken Talakag, Bukidnon. Iti agdama, addan iti 2,000 ektarya ti namulaan ti komersyal a kawayan. Balak ti kumpanya nga agmula ti kabuklan a 100,000 puon, iti tantos a 500 puon kada ektarya.

Ilaklako ti EcoPlanet Bamboo ti plantasyon ti kawayan kas "proyekto a maka-kalikasan" a balbaliw a mangbiag iti nakalbon a kabakiran.

Ngem iti sabali a paset ti lubong, napaneknekan a ti proyekto ken ti mismo a kum-

panya ket maysa nga "scam" wenno salamangka. Mapagduduaan ti panagtagikua ti kumpanya, nakailumlom iti utang ken manangallilaw dagiti kari daytoy iti trabaho, panagdur-as ken panangtagiben iti nakaparsuaan.

Nayon kadagiti nang-agaw ti daga ti Asia-Pacific Precision Agriculture Group, maysa met nga Amerikano a kumpanya. Sinaklaw daytoy ti 2,000 ektarya ken minulaan ti mais usar ti abante a teknolohiya isu nga awan ti napataud daytoy a baro a trabaho. Dinadael daytoy ti kaasideg a kabakiran tapno agiyaplag ti kalsada tapno naparpardas a maiserrek dagiti makina ken lugan nga maaramat iti produksyon.

Sinagutan met ti SPDA ti daga ti Kennemer Foods International ken Sumifru. Ti Kennemer ket maysa a kumpanya a Pilipino a ponpondoan ti bangko a Dutch ken agisusuplay ti kakaw iti Mars Inc, maysa nga Amerikano a kumpanya. Kabayatan na, ti Sumifru ket maysa a kumpanya a Japanese nga agprodprodyus ti saba para kadagiti merkado ti Japan, Thailand, South Korea ken Saudi Arabia. Madama daytoy nga "agababang" kadagiti daga iti tantos a ₱25,000/tawen wenno ₱2,038 kada bulan.

Naituding met a sumrek ti daduma pay a kumpanya ti kape kas ti Nestle (kape), RNF Industries Corporation (abokado) ken dadduma pay a produkto a pang-eksport.

Naranggas a panagpadisi

Saan a pudno ti inbaga ti SPDA a bakante dagiti daga a sinaklaw ti AIDP, wenno dagitoy ket "nakalbo a kabakiran." Ti kadaklan dagitoy ket

Suruten iti panid 9



Manangallilaw a kapya

INSTRUMENTO TI SPDA iti managikuspil a gera ti "kontra-insurhensya" usar ti abbong ti "panagdur-as iti ekonomya." Naitakder daytoy idi 1975 kas paset ti pakete ti "panagsurender" dagiti rebolusyonaryo a pwera ti Moro National Liberation Front iti napalabas. Idi 1980, intakder daytoy ti Kapatiran Agro-Industrial Cooperative Settlement Project kadagiti ili ti Wao ken Bumburan/Amai Manabilang.

Nagbalin met a paset ti SPDA iti Comprehensive Agreement on the Bangsamoro (CAB) a napirmaan idi 2014. Daytoy a katulagan ket resulta ti mano a dekada a saritaan iti kapya a nagleppas iti panagsurender ti Moro Islamic Liberation Front ken panangdis-arma kadagiti pwera da. Maysa kadagiti kontrobersyal a probisyon ti CAB ti "panagbibingay iti kinabaknang" iti baet ti maitakder a parlamento ti Bangsamoro ken nailyan a guberno. Dumaldalan ditoy dagiti kontrata ken katulagan iti baet dagiti upisyal a Moro, nailyan a guberno ken dagiti gangannaet a korporasyon.

Iti agdama, ti SPDA ket idaduluan ni Abdulghani A. Salapuddin, sigud a mangibagi iti Basilan ken dati a mannakigubat ti MNLF.

2 Nalabbaga a mannakigubat, dinukot ken ingagara a pinapatay ti 62nd IB

KINEMMEG KEN INGAGARA a pinapatay dagiti soldado ti 62nd IB ni Tony Pahayahay (Ka Pidot), Nalabbaga a mannakigubat ti NPA-Central Negros idi Mayo 1 idia Barangay Humay-humay, Guihulngan City, Negros Oriental. Ni Pahayahay ket nasugatan iti engkwentro ken nakemmeg iti kaadaya a maysa a kilometro manipud iti nakapasamakan ti labanan. Kabayatanna, maysa pay a nasugatan a Nalabbaga a mannakigubat ti tiniliw ken saan pay nga inparparang dagiti soldado.

Iti dadduma a paset ti pagilyan, tuloy-tuloy dagiti panaglabsing iti karbengan-tao.

Panag-aresto. Inaresto dagiti pulis ti 10 residente ken katutubo a Molbog iti Sityo Marihangin iti Barangay Bugsuk, Balabac, Palawan idi Mayo 15. Supsupyaten dagiti katutubo ti San Miguel Corporation iti panangtagikua daytoy iti daga da tapno pangitakderan ti resort a sumaksaklaw iti nasurok 5,500 ektarya.

Militarisasyon. Manipud pay Marso ket nakaipasidongen iti RCSP ti sumagmamano a barangay manipud iti Baleno ken Masbate City. Segun iti PKM-Masbate, konkontrolen dagiti militar ti tunggal garaw dagiti residente ken makedkedngan ti kaadu ti taraon a mabalin da laeng nga ikonsumo. Sipaparang met a taktakawen dagiti militar dagiti taraken da nga ayup.

Red-tagging. Dua a lider-estudyante manipud iti UP-Cebu ti nagsanud iti kandidatura para iti eleksyon ti estudyante iti kampus daytoy Mayo gapu iti nakaro a *Red-tagging*. Kunada, nakaro a buteng ti napadasan ti dua a kandidato ken dagiti pamilya da kalpasan a rimwar iti *social media* ti ladawan ken nagan da a maisilsilpo iti armado a rebolusyonaryo a tignay.

Manipud iti panid 8

okupado ken suksukayen dagiti Moro, Lumad ken setler a mannalon iti nabayagen a panawen. Dakkel a paset dagitoy ket tawid a daga dagiti Maranao ken Higaonon.

Ginundawayan ti SPDA ti kinaawan ti ligal a sertipiko dagiti Moro, Lumad ken setler tapno agawen ti daga da. Inpademolis ti ahensya dagiti kabalbalayan ken binuldoser dagitoy dagiti kataltalonan, karaman ti ekta-ektarya a kaunasan, kanatengan ken kamaisan. Inyaramid da ti nararangas a demolisyon ken panagpadisi usar dagiti soldado ken pulis, kasta met dagiti elemento manipud iti CAFGU, MILF ken *private army* ti pamilya a Manabilang.

Adda dagiti pamilya a naagawan iti agingga 30 ektarya ti kataltalonan, kabilang dagidiay mannalon ti nateng kas ti karots, repolyo,

patatas ken dadduma pay. Adu ti nagkedked nga umakar iti *relocation site* nu sadinno a ti diaya ket 40 metro kwadrado laeng a daga kada pamilya. Dagiti nakisarita nga agtalinaed kadagiti taltalon ket naikkan laeng ti inkapat (1/4) nga ektarya.

Ti dadduma a napatalaw a mannalon ket pinagtrabaho da kadagiti plantasyon ti Sumifru. Nakabababba ngaruden ti maipaspasweldo kadakuada, masansan pay a maladaw. Awan ti benepisyo da ken kinatalged iti trabaho.

Iti kaso ti EcoPlanet, minulaan da ti kawayan dagiti taltalon nga addaan pay nakamula. Nagmula met dagiti tauhan daytoy ti bin-i agingga kadagiti ruangan dagiti kabalbalayan. Adda dagiti napwersa nga "i-donar" ti daga da iti kumpanya.

Amin kadagitoy ket kasabwat ti pamilya a Manabilang nga agar-ari

iti lokal a guberno. Inaramid daytoy a "sampil" ti panag-aresto iti sumagmamano a nagkedked nga pumanaw iti daga, panangibalud kadakuada ken panangipataw ti nangato a pyansa tapno pangtaan dagiti lumaban. Agar-ari babaen ti teror ti pamilya a Manabilang. Mabigbig daytoy iti masaker ti 17 a setler nga Ilonggo idi 2014.

Nupay kasta, adda dagiti saan a nagungon ken pinarut-parut da dagiti baro a naimula a kawayan kadagiti taltalon. Adda met dagiti gundaway a nalappedan dagiti residente ti panangbuldos iti kaunasan da. Immawag da kadagiti upisyal, ken naminsan pay a nagturong da idia Cagayan de Oro tapno agiyaramid ti tignay protesta. Amin dagitoy ket pakauna pay laeng ken posible nga agbalin a puonan iti sumaruno a laban da.

AB

Panawagan para iti panangibasura iti kontrata iti PrimeWater, lumawlaw

Maris tsaa wenno kape, nabangsit ken saan a kabaelan nga inumen a danum; adda laeng danum iti tengnga't rabii wenno parbangon, adda dagiti aldaw nga awan danum, mano minuto a puro angin laeng ti rumrumwar iti gripo ngem agan-andar ti metro; nangina ken agtultuloy a nguminngina a singir iti serbisyo iti danum—dagitoy ti nakadakdakes a kasasaad ken kapadasan ti umili a manon a tawen a nakapasidong iti PrimeWater ti suplay ti danum kadagiti lugar da.

Pribatisasyon ti serbisyo iti danum

Ti PrimeWater Infrastructure Corporation (PrimeWater) ket kumpanya a sanikua ti kadakkelan a burges komprador iti intero a Pilipinas a pamilya Villar. Iti intero a pagilyan, dimmanon iti 130 *water district* manipud kadagiti syudad ken munisipalidad ti kontrolado ti PrimeWater babaen kadagiti joint venture agreement (JVA). Mapattapatta nga adda iti 16 milyon ti agsangsanggir ditoy.

Iti sidong ti JVA, maipapauneg ti *local water district* (LWD) iti *public-private partnership* (PPP) iti PrimeWater. Iti kastoy a sistema, agbalbalin a pribado ti serbisyo iti danum imbes a pangpubliko a serbisyo.

Iti JVA, igalgalut ti kumpanya dagiti LWD iti 25 tawen a kontrata.

Ti PrimeWater ti mangimatonen iti operasyon, panangisimpa, panangpadur-as ken panangitakder kadagiti imprastruktura, panangmantine ti suplay ti danum ken *septic management system* ken panagsingir ti bayad iti serbisyo. Ti met PrimeWater ti mangikedkeddeng iti agbalin a panagngato ti taripa ken singir iti serbisyo kas paset kano ti pondo daytoy para iti panangpadur-as iti serbisyo. Dagiti LWD ket para subaybay laengen.

Kaniwas kadagiti kari a nakapauneg iti JVA, mano a tawenen nga irekreklamo dagiti LWD ti agdadata a saan a panangsurot ti PrimeWater kadagiti kontrata da a nangitunda ti palpak a serbisyo kadagiti supsuplayan daytoy ti danum iti intero a Pilipinas. Mano a daras met a nagidanon ti Commission on Audit kanaig iti saan a panagsurot iti kontrata ti PrimeWater, saan a panangited ti naan-anay a pondo wenno puonan para iti panagpadur-as ti serbisyo ken panagbaba ti sapul dagiti LWD bayat a dakdakkal ti mapaspastrek ti PrimeWater iti panagbibingay iti pastrek ken dadduma pay nga anomalya.

Panagibasura iti PrimeWater

Manipud iti agtutuan a reklamo iti bulok a serbisyo ti PrimeWater, panangidatag iti petisyon, panagisayangkat kadagiti *press conference*, *noise barrage*, agingga iti panagipila ti pormal a reklamo, nadumaduma a

porma ti sangsangkamaysa a tignay ti inyaramid ti umili ken dagiti organisasyon nga agiyab-abante para iti karbengan iti serbisyo ken danum. Gapu ditoy, naiduron dagiti LWD ken lokal nga ahensya ti gubyrno nga imbestigaran, aksyunan ken putdenen ti kontrata iti PrimeWater.

Nagiruar ti resolusyon ti LWD ti San Jose Del Monte nga aggibusen ti JVA iti PrimeWater idi Abril 3, ti prubinsya ti Quezon idi Abril 30 ken ti Metro San Fernando Water District iti La Union idi Mayo 8.

Nagidatag met ti Notice of Intention to Pre-terminate ti JVA iti PrimeWater ti Camarines Norte Water District idi Enero 20, kasta met ti City of San Fernando Water District iti Pampanga idi Mayo 1. Nagipeksa met ti Leyte Metropolitan Water District iti Tacloban City ti intensyon nga ibabawi ti JVA idi Mayo 5.

Sumaksaknap ken pumigpigsa met ti awag ti umili ti Bacolod ken dagiti residente ti Tierra Nova Subdivision iti Barangay Bagumbong, Caloocan tapno gibusanen ti JVA ti PrimeWater iti lugar da.

Iti kongreso, nagidatag dagiti mangibagi kadagiti *party-list* iti salinong ti Makabayan ti House Resolution 2279 idi Mayo 6 a mangal-allukoy nga imbestigaran ti Kongreso dagiti JVA ti PrimeWater ken nasurok nga 130 LWD iti intero a pagilyan. Immawag ni Rep. Arlene Brosas ti Gabriela Women's Party para iti madagdagus a panangipatungpal kas linteg ti House Bill 10150 wenno Anti-Privatization of Public Water Systems Act.

Nagisumite met ti reklamo dagiti konsyumer ti PrimeWater ken Bayan Muna iti Malacañang idi Mayo 8 tapno iduron ni Ferdinand Marcos Jr nga ibasura ti amin a JVA iti PrimeWater gapu iti agtutuan a kapalpakan ken dagiti ligal nga anomalya daytoy.

